

P378.713

Ot 8ch

CONSTITUTIONES
CATHOLICÆ UNIVERSITATIS OTTAWIENSIS

62152

P378.713

CONSTITUTIONES
CATHOLICÆ UNIVERSITATIS OTTAWIENSIS

A SANCTISSIMO DOMINO NOSTRO

LEONE XIII

APPROBATÆ

BIBLIOTHÈQUE
SAINT-SULPICE

PARISIIS
TYPOGRAPHIA A. HENNUYER

VIA DARCET, 7

—
1891

21031101818
20191102-THIA2

LITTERÆ APOSTOLICÆ
QUIBUS COLLEGIUM OTTAWIENSE DIGNITATE

ET

JURIBUS CATHOLICÆ UNIVERSITATIS DECORATUR

LEO PP. XIII

AD PERPETUAM REI MEMORIAM.

Cum Apostolica Sedes omni tempore curas suas ad tuendam fidei integritatem morumque disciplinam studiosissime adhibuit, tum etiam in eodem peradvigilavit, ut ampla domicilia doctrinis bonisque artibus excolendis catholicæ juventuti paterent, in quibus recta mentis atque animi institutio ad privatam ac publicam societatis humanæ utilitatem posset hauriri, eademque cum opus esse censuit, nunquam prætermisit, quin eorum domiciliorum dignitati, stabilitati et prosperitati adserendæ suæ auctoritatis et opis præsidia conferret.

Has ob causas gratissimum fuit Nobis intelligere jam inde ab anno Christi MDCCCXLVIII, Ottawæ præclara in urbe Canadensis regionis, Collegium juventuti catholicæ instituendæ conditum fuisse a Josepho Eugenio Guigues, illustris memo-

riæ, Presbytero Congregationis Oblatorum Mariæ Immaculatæ, qui primus Ottawæ Episcopus datus est, idemque Collegium ampliora in dies incrementa feliciter suscepisse, tum Collegii ædificio novis operibus amplificato, tum bibliotheca instituta, et museis omnique instrumento ad omnigenam eruditionem comparatis, tum concursu et frequentia alumnorum quos laus et fama institutionis e longinquis etiam locis excivit, adeo ut Collegium ipsum decreto edito a supremo Canadensis regionis Concilio legifero anno MDCCCLXVI dignum judicatum fuerit, ut justum ac legitimum Universitatis civilis studiorum nomen acciperet, omnibusque donaretur juribus quibus cæteræ Universitates potestatis civilis auctoritate fruuntur.

Cum hæc Collegio Ottawiensi fauste et feliciter evenissent, huic Apostolicæ Sedi anno MDCCCXLVIII, preces oblatae sunt Præpositi Congregationis Oblatorum Mariæ Immaculatæ, ac doctorum decurialium Collegii, necnon litteræ Archiepiscopi Ottawiensis impense postulantium, ut idem Ottawiense Collegium tot nominibus commendatum, dignitate et juribus catholicæ Universitatis, ex more institutoque Apostolicæ Sedis augeretur.

Hujusmodi preces Nos libenter excipiendas censuimus. Novimus enim quantas opportunitates habeat Lyceum magnum optimorum studiorum in urbe nobilissima Ottawæ Archiepiscopalis cathe-

dræ honore aucta et civilis regiminis sede, constitutum, quæ natura loci media inter alias Canadensis regionis urbes assurgens, omnibus commeantibus facile pervia est, ac ex præsentia insuper lectissimorum virorum, qui in supremis civilis potestatis consiliis sedent, quique rerum publicarum administrationem gerunt, splendidam capit accessionem dignitatis. Novimus etiam quo studio dilecti filii Sodales Congregationis Oblatorum Mariæ Immaculatæ ab anno MDCCCXLVIII rectæ institutioni juventutis operam dederint, curis pariter ac opibus suis in hoc salutare opus, ejusque tuitionem ultro collatis, et quantopere semper cordi fuerit ejusdem Congregationis Præpositis apud suos, obsequium erga Apostolicam Sedem et sacrorum Antistites, uti decet tueri et fovere, ac præstantes suæ Congregationis alumnos ad docendi munus in Ottawiensi Collegio promovere, quorum plures in hac alma Urbe in Gregoriano Lyceo Societatis Jesu doctrinæ laurea ornati fuere, simulque advigilare ut philosophicæ ac theologicæ institutiones ex sancti Thomæ Aquinatis doctrina traderentur, quibus rebus factum esse compertum habemus, ut plures præclarique ex Ottawiensium doctorum disciplina alumni prodierint qui existimationem et decus institutoribus suis late conciliarunt.

Nos igitur hisce rebus rite perpensis, et communibus votis libenter annuentes, tum Venerabilis Fratris Josephi Thomæ Duhamel, Archiepiscopi

Ottawiensis, tum Præpositi et Sodalium Congregationis Oblatorum Mariæ Immaculatæ aliorumque illustrium Ottawiensium civium, hisce litteris, ad majorem Dei gloriam, ac incrementum catholicæ religionis, ac decus utilitatemque Canadensis regionis, Ottawiense Collegium catholicæ juventuti erudiendæ a Congregatione Oblatorum Mariæ Immaculatæ conditum, cujus regimen et magisteria a Presbyteris Congregationis ejusdem sub hujus Sanctæ Sedis, et Archiepiscopi auctoritate geruntur, canonica institutione ad dignitatem catholicæ Universitatis studiorum evehimus, eidemque Universitati jus attribuimus, ut Magisterii lauream, aliosque gradus academicos in singulis doctrinæ generibus ad consueta Universitatum statuta et leges conferre possit.

Cum porro plurimum intersit ad prosperitatem Universitatis et decus, eam rectis aptisque legibus prudenter instrui, quibus regimini ejus opportune consulatur, volumus et statuimus, ut ejusdem Universitatis statuta, et leges huic Apostolicæ Sedi, primo quoque tempore, exhibeantur, quo iis mature expensis, Ea possit suæ auctoritatis robur adjicere. Volumus præterea, ut Apostolici Cancellarii munere in eadem Universitate, Venerabilis Frater Archiepiscopus Ottawiensis et qui post eum futuri sunt in Archiepiscopali Sede, fungantur, atque ut ipse Archiepiscopus et successores ejus, necnon alii Provinciæ Ottawiensis et Torontinæ

episcopi, qui Seminaria, Collegia, aliaque hujusmodi instituta, prædictæ Universitati aggregaverint, rectæ sanæque doctrinæ tuendæ in eadem Universitate præsent. Potestatem denique facimus eidem Universitati, ut ad morem Lycei Magni Quebecensis, alumnos, qui in Seminariis, Collegiis aliisque institutis ecclesiasticarum Provinciarum Ottaviensis et Torontinæ dumtaxat erudiantur, in numerum alumnorum suorum adsciscat eosque paribus ac cæteros Ottawiensis Lycei auditores favoribus prosequatur. Hæc volumus et statuimus ac propterea decernimus has Litteras Nostras firmas validas et efficaces semper existere et fore, suosque plenarios, et integros effectus sortiri, et obtinere, atque illis ad quos spectat, et pro tempore quomodolibet spectabit, in omnibus, et per omnia plenissime suffragari; sicque in præmissis per quoscumque judices ordinarios, et delegatos, etiam causarum Palatii Apostolici Auditores, Sedis Apostolicæ Nuntios, ac sanctæ Romanæ Ecclesiæ Cardinales, etiam de latere Legatos, sublata eis, et eorum cuilibet, quavis aliter judicandi et interpretandi facultate, et auctoritate judicari, et definiri debere, atque irritum et inane esse, si secus super his, a quoquam quavis auctoritate, scienter vel ignoranter, contigerit attentari. Non obstantibus licet speciali, atque individua mentione ac derogatione dignis in contrarium facientibus quibuscumque.

Datum Romæ apud Sanctum Petrum sub annulo

Piscatoris, die V februarii MDCCCLXXXIX,
pontificatus Nostri anno decimo primo.

Pro Domino Cardinali LEDOCKOWSKI,
F. FAUSTI, substitutus.

Locus † sigilli.

XXIX,

KI,
utus.

LITTERÆ CANCELLARII ET PRÆSIDIS
UNIVERSITATIS OTTAWIENSIS

AD SANCTISSIMUM DOMINUM NOSTRUM

LEONEM XIII.

BEATISSIME PATER,

Universitas Ottawiensis, a Sanctitate Tua anno nuper elapso constituta, ad sacros pedes provolvitur in persona Illustrissimi Cancellarii Josephi Thomæ Duhamel, Archiepiscopi Ottawiensis, et Reverendissimi Præsidis Cœlestini Augier, e Congregatione Oblatorum Beatissimæ Mariæ Virginis Immaculatæ, ejusdem Congregationis præpositi provincialis pro Canada, qui Romam eo fine petierunt; et Tibi, ut Auctori et Parenti munificentissimo, grati animi sensus significat iterum atque iterum.

Non enim aliquorum, imo vero commune omnium bonum, nec vulgare, at insigne Providentia Tua Canadensi regioni contulit beneficium, cum Ottawiense Collegium dignitate et juribus Catholicæ Universitatis decoravit; quod Moderatores, Doctores, et quotquot unquam erunt alumni, memoria servabunt imperitura.

Quod verbis profitemur re et factis implere

satagemus. Sedi apostolicæ arctius hærere, Ejus jura vindicare, leges tueri, jussis parere, consiliis obtemperare, mentem in omnibus sequi, religio nobis erit. Doctrinam vero ex Aquinatis limpidissimo fonte hausturos, et tradituros, nec latum unguem ab ea discessuros, prompto libentique animo spondemus, jamque pro virili parte fecisse testamur.

Quum autem ad Universitatis prosperitatem ac decus eam rectis aptisque legibus instrui statueris quibus ejus regimini consuleretur, mandato huic Tuo obsecundantes iidem Cancellarius et Præsides Constitutiones Universitatis sive generales, sive speciales Sanctitati Tuæ recognoscendas, examinandas et pro sapientia Tua adprobandas exhibent. Qua adprobatione semel concessa, impositum erit ædificio fastigium, et firmum, sartum tectumque stabit Leoninum opus.

Interim dignetur Sanctitas Tua filiorum suorum humillimorum sensus acceptos habere, precibus annuere, et nobis omnibus, Cancellario, Præsidi, Professoribus, Doctoribus Alumnisque universis, qui sacros pedes pie deosculamur, huicque nostræ devotissimæ Universitati, Apostolicam Benedictionem impertiri.

† J. THOMAS, Archiep. Ottawiensis.

Cælestinus AUGIER, O. M. I.

Prov. et Universitatis Ottawiensis Præsides.

LITTERÆ APOSTOLICÆ
QUIBUS APPROBANTUR CONSTITUTIONES

SIVE GENERALES SIVE SPECIALES

CATHOLICÆ UNIVERSITATIS OTTAWIENSIS.

LEO PP. XIII

AD FUTURAM REI MEMORIAM.

Cum Nobis Romanorum Pontificum Prædecessorum Nostrorum vestigiis inhærentibus potius nihil sit atque antiquius, quam ut catholica juvenitus optimis informetur disciplinis, ad nobiliora religiosæ in litteris ac scientiis institutionis lycea, quæ et doctorum præstantia, et auditorum frequentia eniteant, cogitationes curasque nostras intendere pro re ac tempore satagimus. Hac mente Conlegium in præclara Canadensis regionis urbe cui vulgare nomen « Ottawa » jam inde ab anno MDCCCXLVIII fundatum, amplioribusque in dies continuo, nec intermissis unquam, incrementis ornatum, ideoque anno MDCCCLXVI a supremo legifero Consilio Canadensis regionis nomine et juribus Universitatis civilis auctum, precibus suffragiisque annuentes Præpositi generalis Congregationis Oblatorum Mariæ Immaculatæ, cui idem Conlegium concreditum est, et Doctorum ipsius Conlegii Decurialium, necnon

Venerabilis Fratris Archiepiscopi Ottawiensis, per Litteras Apostolicas quæ incipiunt *Apostolica Sedes* anno M DCCC LXXXIX datas dignitate ac juribus Catholicæ Universitatis decoravimus. Nonnulla insuper statuimus ad ipsius Universitatis bonum perutilia, ac perpendentes ad Universitatis prosperitatem ac decus plurimum interesse eam rectis aptisque legibus prudenter instrui, quibus ejus regimini opportune consuleretur iussimus ut illius Universitatis statuta et leges Apostolicæ huic Sedi primo quoque tempore exhiberentur, quo iis mature examinatis auctoritatis Nostræ robur adjiceremus. Mandato huic Nostro tum Venerabilis Frater Ottawiensis Antistes, tum dilectus filius Universitatis memoratæ Rector nuper obsecundantes, Statuta seu Constitutiones Universitatis generales et speciales seu proprias Facultatum Philosophiæ, Theologiæ ac Juris Canonici Nobis exhibuere enixe adprecantes, ut ad examen illas revocare et Apostolica auctoritate confirmare dignaremur. Nos autem omnibus rei momentis attento ac sedulo studio perpensis cum Venerabilibus Fratribus Nostris S. R. E. Cardinalibus negotiis Propagandæ Fidei præpositis, postquam prævio maturo examine statuta et constitutiones præfatas, de Fratrum eorundem consilio, opportune emendavimus memoratis precibus annuendum existimavimus. Quare omnes et singulos, quibus Nostræ hæ litteræ favent, peculiari benevolentia complec-

tentes, et a quibusvis excommunicationis et interdicti, aliisque ecclesiasticis sententiis, censuris et pœnis quovis modo vel causa latis, si quas forte incurrerint, hujus tantum rei gr̃tia absolventes et absolutas fore censentes, Catholicæ Universitatis Studiorum Civitatis Ottawiensis Statuta, seu Constitutiones generales, ac speciales Philosophiæ, Theologiæ et Juris Canonici facultatum, emendatas, juxta exhibitum exemplar, cujus prima verba sunt *Universitati Catholicæ*, postrema vero *Nihil in hisce Constitutionibus immutandum aut tollendum inconsulta Sancta Sede*, quod in tabulario Secretariæ Nostræ Brevium custodiri mandavimus, Apostolica Nostra Auctoritate præsentium vi definitive approbamus, sancimus, ratasque habemus, Decernentes has Nostras Litteras firmas, validas et efficaces existere et fore, suosque plenarios et integros effectus sortiri et obtinere, illisque ad quos spectat, et in posterum spectabit in omnibus plenissime suffragari, sicque per quoscumque Judices ordinarios et delegatos judicari et definiri debere, atque irritum et inane si secus super his a quoquam quavis auctoritate scientes vel ignorantes contigerit attentari. Non obstantibus Constitutionibus et Ordinationibus Apostolicis ceterisque contrariis quibuscumque. Datum Romæ apud S. Petrum sub Annulo Piscatoris die XII Junii MDCCCXCI Pontificatus Nostri anno decimoquarto.

M. Card. LEDOCHOWSKI.

CONSTITUTIONES GENERALES

CATHOLICÆ UNIVERSITATIS OTTAWIENSIS

I. — DE UNIVERSITATIS SCOPO.

1. Universitati catholicæ Ottawiensi is præstituitur finis ut catholicæ fidei prælucente et regente veritate, juvenus bonis disciplinis, per superiores divinarum humanarumque scientiarum gradus instituatur.

2. Tanquam Supremum Magistrum Universitas habet Romanum Pontificem, Catholicæ Ecclesiæ Pastorem ac Doctorem infallibilem, cujus apostolicam auctoritatem plena perpetuaque submissione colet.

3. Uti litteris apostolicis Summi Pontificis LEONIS XIII gloriose regnantis, datis idibus Martii anno MDCCCLXXXIX, præcipitur, Universitati custodes patroni ducesque aderunt: imprimis Archiepiscopus Ottawiensis, tanquam Cancellarius Apostolicus, tum reliqui Episcopi provinciæ ecclesiasticæ ejusdem nominis atque Episcopi regionis Ontario qui propria seminaria, collegia ceteraque hujusmodi Instituta Universitati cooptaverint. Horum omnium erit rectæ sanæque doctrinæ tradendæ in Universitate præesse.

4. Quoad reliqua vero omnia, Universitas, quæ

curis Congregationis Missionariorum Oblatorum SS^mæ et Immaculatæ Virginis Mariæ perpetuo addicitur, regimini Superioris Generalis ejusdem Congregationis suberit. Is autem auctoritatem, hierarchico ordine servato, in Universitate generatim exercebit, integro tamen ipsi jure interveniendi directe cum id expedire judicaverit.

5. Sub apostolici Cancellarii prædictorumque in art. 3 Episcoporum vigilantia et sub Superioris Generalis, prouti in art. 4 statuitur, auctoritate, Universitatem moderabitur Rector, assistentibus concilio administratorum et senatu academico.

6. Rectori, qui in Universitate residere oportet, præsto erit proprius Vicarius (seu Vice-Rector) atque insuper addentur Secretarius Universitatis, Præfectus studiorum, Præfectus disciplinæ et Procurator.

7. Pro opportunitate, copia cum suppetat, omnes sensim facultates instituentur, quæ perfectam Universitatem decent, ac tot numero statuentur docentium cathedræ, quot utilitas alumnorum suaserit.

II. — DE EPISCOPORUM CONSILIO.

8. Quum Archiepiscopis et Episcopis de quibus superius sermo est in art. 3 id officii incumbat ut quoad doctrinas moresque tum doctorum tum alumnorum advigilent, hunc ad finem una ipsi convenient in Urbem Ottawiensem semel, saltem, in

anno. Hujusmodi autem conventui præerit Cancellarius, eoque absente, prior inter Archiepiscopos, et, si nullum adesse Archiepiscopum contigerit, præsideat prior inter præsentes Episcopos.

9. Eosdem convocare insuper poterit Archiepiscopus Cancellarius quotiescumque ipse opportunum id duxerit, vel etiam cum id ab ipso expetierit, rationum momentis adductis, quivis ex Episcopis ad consilium pertinentibus.

10. Ea solum decreta vim habeant quæ ex plurium suffragiis lata fuerint, dummodo major pars Episcoporum deliberationi adfuerit : votis vero utrinque paribus, Archiepiscopo aut Episcopo qui præerit præponderans suffragium referatur, nisi rei gravitas ad aliam sessionem plurium suffragiis iudicium definitivum differre suadeat.

11. Cæterum nihil ipsi statuere queunt quod litteris apostolicis de canonica Universitatis erectione, aut constitutionibus a Sancta Sede approbatis, aut actui civilis recognitionis (civilis approbationis diplomati) aut eorum juribus, qui Universitatis personam coram civili lege gerunt, adversetur. Eas solum præcipere expensas poterunt, quas viribus suis haud impares consilium administrationis judicaverit.

12. Si quid in doctrina aut moribus reprehensione dignum ab ipsis existimetur, rite antea vestigatum et compertum scripto accurate definitum proponant. Item judicare Episcopi debent si quid

exploratum ipsis fuerit in Universitatis regimine aut doctrina tradita quod eorum iudicio, vergere queat in detrimentum Ecclesiæ aut rei publicæ.

13. Quidquid ipsi animadvertendum habeant de doctrina aut modo procedendi Universitatis, vel de ratione agendi cujuspiam, Rectori proponant; ei vero nunquam de quo res agitur. Quod si res foret de ipso Rectore, tum Cancellarius animadversiones proprias aut Episcoporum Superiori Generali aut Provinciali exhibebit. Hujusmodi autem animadversiones nihil prorsus minuunt de juribus quibus Ordinarius, sive ut talis, sive ut Cancellarius pollet.

14. Rector præhabito Consilii administrationis sensu, singulis annis, haud serius idibus Augusti, scripta referat quæ per annum in Universitate fuerint peracta eaque sic litteris consignata exhibeat etiam Episcopis cum in annualem conventum coiverint.

15. Universitas submissum animo obsequium ac conjunctissimam voluntatem erga Episcopos profitetur. Quapropter studiose curabit eorum auctoritatem ac consilium sectari, quos sibi duces tutoresque Summus ipse Pontifex constituit. Siquando vero dissidium aliquod exoriri forte contigerit, res ad Apostolicam Sedem deferatur, quæ statuet quid pro rei opportunitate decernendum aut providendum fuerit.

III. — DE UNIVERSITATIS CANCELLARIO.

16. Cancellarius Vices Summi Pontificis apud Universitatem gerit. Ipsius est Episcoporum cœtum convocare, eique præesse, gradus academicos adscito Rectore et studiorum Præfecto in Universitate conferre, diplomata cum eisdem et Decano cujusque facultatis subscribere, materias pertractandas et programmata examinum unoquoque anno in iis quæ ad doctrinam pertinent adprobare.

IV. — DE RECTORE.

17. Rector Universitatis Sacerdotio auctus esse debet, sacræ theologiæ Doctor et sodalis Congregationis Missionariorum Oblatorum Sanctissimæ et Immaculatæ Virginis Mariæ. Ipsum eligit et nominat Superior Generalis Congregationis una cum suo consilio, accedente Sanctæ Sedis approbatione.

18. Ipsius est Universitatem moderari ad tramitem vigentium Constitutionum et Regularum.

19. In Episcoporum consilium ipsum advocari convenit eorumque interesse deliberationibus, ut ea quæ oportet patefaciat opportunasque explanationes suppeditet.

20. Integrum ipsi erit præesse si libuerit, cum jure ferendi suffragii, consiliis et conventibus cujusvis facultatis in Universitate. Decreta aut præcepta quævis subsignata ab eo sint oportet.

21. Ipse cum administratorum consilio officiales Universitatis eligit, iis exceptis quorum renunciatio Superiori Generali reservatur. Ipsi jus inest, si causa non patitur moram, removendi ad breve tempus Doctores (professores) a prælectionibus tradendis, re interim delata ad senatum academicum; ipse alumnos admittet et dimittet, salvo jure recursus in devolutivo ad consilium administratorum, ipse demum in casibus particularibus iis de rebus decernet, quibus per constitutiones aut regulas provisum forte non fuerit.

22. Ejus item officii erit dare, si quando opus fuerit, de negotiis Universitatis litteras ad Sedem Apostolicam, ad Episcopos, et ad Superiorem Generalem Congregationis Oblatorum aut Superiores Magistratus civiles.

V. — DE RECTORIS VICARIO. — DE SECRETARIO
UNIVERSITATIS. — DE STUDIORUM PRÆFECTO. —
DE DISCIPLINÆ PRÆFECTO ET DE PROCURATORE.

23. Rectoris Vicarius sit Sacerdos, Doctor S. Theologiæ et sodalis Congregationis Oblatorum. Ipse a Superiore Generali renunciatur, salvis regulis propriæ Congregationis, audito etiam Rectore. Nil obstat quominus ipse queat aliis etiam in Universitate officiis fungi, v. gr. Secretarii, Præfecti sive studiorum sive disciplinæ, Procuratoris aut etiam Professoris; at si in quodam horum officiorum

subesse ipsum contigerit alicui ex suis confratribus, nihilominus ipse tanquam Rectoris Vicarius, ceteris omnibus, post Rectorem, semper præcedat.

24. Ipse præsto erit Rectori in suo munere obeundo ejusque absentis vices explet.

25. Ad eum pertinet, sub Rectoris ductu, curare ut Doctores et Officiales Universitatis in suo officio quique ita contineantur, ut cuncta debito ordine procedant et iis quibus par est sollicitudine diligentiaque peragantur.

26. Secretarius Universitatis, cui incumbit curam Tabularii gerere, operam navabit actis Universitatis conficiendis et asservandis et generatim iis, quæ oporteat, scripto consignandis. Consilii proinde Administratorum ac Senatus academici acta litteris notabit, documentis majoris momenti suam etiam subscriptionem adponet, exemplarium fidem testabitur, epistolis conscribendis, sub ductu Rectoris et quatenus huic placuerit, dabit operam, demum sub custodia ipsius sigillum Universitatis asservetur.

27. Sub rectoris auctoritate ac moderamine Præfectus studiorum de doctrina tradenda curam gerit, advigilat ut Professores materias singulis annis adsignatas absolvant; experimenta ut rite fiant prævidet ac disponit, et denique curat ut Doctores in suis prælectionibus ab Universitatis legibus ne minimum quidem discedant.

28. Præfecti disciplinæ officium erit ea omnia diligenter curare in Universitate quæ disciplinam

moresque respiciunt. Auctoritatem in alumnos eate-
nus habet, ut eos ad rectam agendi rationem revo-
cet in eaque contineat.

29. Procurator, sub auctoritate et vigilantia Rec-
toris et consilii Administratorum, negotia æcono-
mica Universitatis gerit de quibus singulis mensibus
Rectori ejusque consilio referet, singulis vero
ternis mensibus Superiori Generali. Trimestri con-
ventui, qui ad rationes suæ administrationis expen-
dendas peculiariter habebitur R. P. Provincialis
præerit.

VI. — DE ADMINISTRATORUM CONSILIO.

30. Officiales superius memorati, nempe Rector,
Rectoris Vicarius, Secretarius Universitatis, Præ-
fectus Studiorum, Præfectus disciplinæ et Procu-
rator, qui omnes socii erunt Congregationis Obla-
torum consilium administratorum efformant iidemque
omnes a Superiore Generali renunciuntur.

31. Consilium una conveniet singulis mensibus,
vel sæpius, si id expedire Rector judicaverit. Ipsum
de omnibus majoris momenti negotiis, ad Univer-
sitatem pertinentibus, deliberat, quin tamen de iis
quæ a superiori auctoritate definiri debent, decre-
tum ferat. Ipsum vero rationem in peragendis stu-
diis servandam aliaque quæ generalem disciplinam
respiciunt auctoritate sua ad examen revocat ac
tuetur.

VII. — DE SENATU ACADEMICO.

32. Quæ ad gradus academicos quomodocumque spectant per Senatus auctoritatem definiuntur. Ipse advigilat ut statutæ conditiones ad gradus conferendos accurate servantur. Ipsi de factis ab auditoribus periculis examinatores referant, ut qui digni visi fuerint ad gradus admittat. Elenchum quæstionum pro examinibus et regulas eadem spectantes in rebus a superiore auctoritate non definitis sua auctoritate sancit, ac si quidquam immutandum in Statutis a Sancta Sede approbatis judicaverit, id cum suis rationibus ad eandem referat.

33. Senatus Academicus efformabitur ex Archiepiscopo Ottawiensi, Cancellario Apostolico, qui principem honoris locum in eo tenet, ex Rectore, qui sub Cancellarii dependentia deliberationes moderabitur, ex Vicario, ex Præfectis studiorum et disciplinæ, ex Procuratore, ex omnibus Facultatis Theologiæ Doctoribus, ex Decanis aliarum Facultatum eorumque Vicariis, accedente insuper uno Doctore in unaquaque harum facultatum quotannis electo.

34. Senatus semel saltem cogatur per annum et quotiescumque præterea de gradibus academicis agatur.

VIII. — DE DECANIS, DECANORUM VICARIIS
ET DOCTORIBUS.

35. Unaquæque Facultas proprium Decanum eligit, Decanique Vicarium. Hujusmodi electio confirmationem accipiat oportet a Rectore ejusque Consilio Administratorum. Decani eorumque Vicarii triennium in officio permanebunt ac denuo eligi semper poterunt.

36. Decanus quæ in propria Facultate doctrina tradatur attendit; mensuris Facultatis comitiis ipse præsidet.

37. Ejus forte absentis vices gerit Decani Vicarius.

38. Facultas quælibet proprium etiam sibi Secretarium eligit, qui conventuum acta atque decreta scripto notabit. Hujusmodi autem decreta, ut vim legis assequantur, rata habeantur oportet vel ab Administratorum Consilio, vel a Senatu Academico, prout rei, de qua agitur, natura expostulaverit.

39. Doctores in triplicem ordinem distinguuntur: Doctorum Decurialium, Sociatorum et Academicorum.

40. Doctores Decuriales deligere Superioris Generalis Oblatorum est, ad cathedras quæ a Sodalibus Congregationis Oblatorum occupantur. Ad reliquas vero eosdem deliget Rector cum suo consilio, favente tamen sententia Facultatis in qua promoveri ad docendum debet.

41. In deligendis Doctoribus Sociatis eadem ratio servetur. Ipsi in tradendis levioribus disciplinis operam generatim impendent, Doctorumque Decurialium Vices in docendo explere ad tempus poterunt, si horum quempiam aliquando aliquo impedimento detineri, aut cathedram aliquam forte vacare contigerit.

42. Academici vero privatas prælectiones habebunt aut ea quæ in scholis tradita fuerint apud auditores recolent; ac præsto sua opera Doctoribus, cum oporteat, erunt.

43. Alte autem in uniuscujusque animo fixa maneat hæc præclara Verba Concilii Vaticani : « Quoniam vero satis non est hæreticam pravitatem devitare, nisi ii quoque errores diligenter fugiantur, qui ad illam plus minusve accedunt, omnes officii moneamus etiam servandi Constitutiones et decreta quibus pravæ hujusmodi opiniones, quæ isthic diserte non enumerantur, ab hac Sancta Sede proscriptæ et prohibitæ sunt. » (*Constit. de Fide cath. Can. IV.*)

IX. — DE DISCIPLINIS ET AUDITORIBUS.

44. Juxta formale Votum Leonis XIII Summi Pontificis necnon Universitatis fundatoris, disciplinæ ea perfectione tradantur quæ par est in *Optima* Universitate, curaque peculiaris habeatur ut ad mentem divi Thomæ, theologia et philosophia tradantur.

45. Qui in Universitatem admitti volunt alumni,

aut instituto periculo, aut documentis oportet ut sese probent idoneos, iisque disciplinis rite jam instructos, quibus via munitur ad Facultatem ad quam adspirant.

46. Cooptari Universitati poterunt Seminaria et Collegia. Quæ ab huiusmodi cooptatis institutis data fuerint propriis alumniis diplomata de peractis bono cum exitu studiis jus præbent ad admissionem in Universitatem.

47. Alumnorum alii intra, alii extra Collegia degent. Qui in collegiis Universitatis commorantur statutas in illis sequantur regulas; proprias etiam sibi habebunt, fideliter servandas, qui extra collegia versantur. Omnes autem eo vitæ instituto mores componant ut ornamento sint catholico nomini quo honestantur, et Universitati ad quam pertinent.

48. Quivis alumnus vel in collegiis degat, vel secus, si regulas Universitatis violaverit, privato aut publico monitu reprehendetur, ad tempus removebitur, vel etiam expelletur, prouti patratae culpæ gravitas postulaverit.

X. — DE GRADIBUS ACADEMICIS.

49. Ad experimentum pro gradibus assequendis ii solum admittantur alumni quos bonis moribus, honestari diligentique studio, disciplinas coluisse constet.

50. Qui digni visi fuerint alumni pericula duo facient, oretenus unum, scripto alterum, iis servatis

conditionibus pro unaquaque facultate rite statutis.

51. Qui Doctores creantur, cum diploma collati honoris recipiunt, professionem fidei emittent, juxta formulam a Summis Pontificibus Pii IV et Pio IX præscriptam.

XI. — DE CÆLESTIBUS UNIVERSITATIS PATRONIS.

52. Universitas Ottawiensis peculiarem apud Deum Patronam habebit Beatissimam Virginem Mariam sine labe conceptam, cujus dies festus VI. Id. Dec. peculiari pietate solemnique pompa coletur.

53. Insuper Moderatores alumnique impensam devotionem tutissimum inde habituri præsidium, erga Sacratissimum Cor Jesu profitentur, eamque etiam apud cœteros pro viribus amplificandam curabunt.

54. Singularem etiam venerationem ipsi prosequentur Sanctum Josephum, Collegii Patronum, et Sanctum Thomam Aquinatem Catholicarum Scholarum Patrocinatorem cœlestem.

XII. — DE CONSTITUTIONIBUS SERVANDIS.

55. Rector cum suo consilio opportunas statuere poterit regulas quæ hisce constitutionibus servandis conferant.

56. Nihil in his constitutionibus immutari, nec

quidquam de iis derogari poterit sine approbatione Apostolicæ Sedis.

57. Uniuscujusque Facultatis constitutiones propriæ in ipsa facultate elaborandæ, hisce generalibus Universitatis constitutionibus consentaneæ sint et Sanctæ Sedis approbationi submittantur.

CONSTITUTIONES PROPRIÆ

FACULTATUM PHILOSOPHIÆ, THEOLOGIÆ AC JURIS CANONICI

I. — DE FACULTATE PHILOSOPHICA.

1. Quum a philosophia cæterarum scientiarum recta ratio pendeat magna ex parte, plurimum interest, ut in Universitate catholica Ottawiensi « bono fidei apte respondeat et ipsi humanarum scientiarum dignitati sit consentanea ». Quocirca divi Thomæ doctrinam, et quidem juxta ipsius methodum, hisce tamen temporibus attemperatam tradere, illustrari inter præcipua officia semper habebit philosophica facultas. His accedit, expositio naturalium quas vocant scientiarum, itemque juris naturalis et œconomiae tum politicæ tum socialis.

2. Nullus inter philosophiæ auditores computetur, præter eos qui se, prærequisitas cognitiones acquisivisse, instituto examine, aut fide dignis documentis ostenderint.

3. Ad philosophiam tradendam aut addiscendam lingua latina utantur doctores et alumni.

4. Triennio philosophicorum studiorum curriculum complebitur.

5. Duobus tamen prioribus annis integra philosophia tradetur. Tertium vero annum cursus superior, de quo infra, occupabit.

6. Post primum annum emensum, periculum

facere ad baccalaureatus gradum adipiscendum fas erit alumnis ; prolytatus post secundum ; doctoratus autem post tertium.

II. — DE FACULTATIBUS THEOLOGIAE ET JURIS
CANONICI.

7. Cum scientiarum omnium sit parens, magistra ac fastigium in Universitate catholica Ottawiensi primum locum tenebit primasque curas sibi vindicabit Sacra Theologia, in qua praesertim divum Thomam ducem et magistrum sequi oportet. Totis igitur viribus niti debet theologica Facultas ut optimo modo tradatur ipsum dogma, et quaecumque cum ipso connectantur, videlicet, doctrina moralis, Scriptura Sacra veteris et novi Testamenti, medulla Patrum et Doctorum, historia ecclesiastica, rituum leges, eloquentiae sacrae praecepta.

8. Hanc sacram doctrinam docendo tanquam ducem fidissimum et infallibilem praeceptorem Romanum Pontificem habeant Doctores, seduloque curent ne ab ipsius doctrina et auctoritate minime deflectant : ipse est enim caput et vox indeficiens Ecclesiae, quae est columna et firmamentum veritatis.

9. Nemo ad sacram theologiam addiscendam accedat, nisi emenso totius philosophiae cursu, duos saltem per annos.

10. Theologiae curriculum completum sex con-

stabit annis, in quorum quatuor prioribus omnes tradentur tractatus, ultimis duobus cursui superiori servatis.

11. Post annum secundum baccalaurei, post tertium prolytæ creari poterunt, prævio examine, Universitatis alumni; doctores vero nonnisi post expletum cursum superiorem.

12. Quod ad jus canonicum attinet, integra doctrina tribus annis tradetur : quorum primo, Institutionibus, duobus vero ultimis, juri publico ecclesiastico et enarrationi textus Decretalium opera dabitur. Institutiones tamen, una cum Sacra Theologia, et primo quidem quadriennio addiscere possunt alumni.

13. Peracto Institutionum et Theologiæ cursu, ad gradum baccalaureatus contendere poterunt : post auditam per annum enarrationem textus ad prolytatum; ad lauream autem expleto integro cursu.

III. — DE SCHOLA SUPERIORI.

14. In Universitate Ottawiensi schola superior instituenda erit cujus præcipuum officium sit viam parare ad doctoratum in philosophia, theologia et jure canonico.

15. In hac schola præcipuæ quæstiones ampliori et profundiori modo pertractabuntur.

16. Cursus superior philosophiæ uno anno, duo-

bus vero cursus theologiæ et juris canonici absolvetur.

17. Nullus ad hanc scholam admitti poterit, nisi prolytatu pro philosophia aut theologia, baccalau-reatu pro jure canonico insignitus fuerit.

18. In omnibus quidem scholis philosophiæ et theologiæ, sed præcipue in schola superiori frequens vigeat usus domesticarum disputationum, interdum etiam fiant publicæ et solemniore.

19. Hanc superiorem scholam presbyteris et ordinum religiosorum sodalibus sequi fas erit, dummodo licentiam scriptam proprii superioris exhibuerint et prævia studia a scholæ legibus requisita compleverint.

20. Iis autem qui Universitatis scholas frequentarunt, nec possunt scholam superiorem sequi, ad lauream pro philosophia et theologia, ad prolytatum vel lauream pro jure Canonico non denegabitur aditus. Verum præter licentiam proprii Superioris descripto, dispensationem a Decano Facultatis et Universitatis Rectore, postulare tenebuntur, quæ nonnisi gravibus de causis concedenda erit. Insuper ad se sistendum coram professore præfixis temporibus obstringentur, ut, ab ipsis directionem accipiant, et se acriter in studium incumbere necnon intellectum acquirere, privatis institutis examinibus, ratum faciant. His per biennium adimpletis, si de Sacra theologia vel jure Canonico agatur et per unicum annum si de philosophia, ad solemne periculum admittantur.

IV. — DE PERICULIS FACIENDIS.

21. Leges quæ pericula facienda regant et rationes quæ postulantium ingenium et studia testentur a senatu academico constituendæ sunt : ita tamen ut pro baccalaureatu examen per dimidiam saltem horam perduret ; pro prolytatu per integram horam ; et pro doctoratu per horam cum dimidio.

22. Insuper in quacumque Facultate, examen pro baccalaureatu complectatur circa dimidiam partem philosophiæ aut theologiæ aut institutiones juris ; pro prolytatu totam philosophiam aut theologiam, vel dimidiam partem Decretalium. Pro doctoratu vero theses ad minus quinquaginta totam doctrinam philosophicam aut theologicam aut juridicam complectentes præclare defendantur.

23. In quocumque etiam periculo, scripto pertractetur quæstio aliqua e materia examinis desumpta.

V. — DE COLLEGIO DOCTORUM.

24. Collegium Doctorum, præter Cancellarium et Rectorem complectitur decuriales et sociatos qui docendi munere funguntur.

25. Decuriales consilium Facultatis constituunt, et ex ipsis deligentur Decanus, Vicarius et Scriba. In hoc quidem consilio doctores sociati admittantur cum voce tantum consultativa.

26. Singulis mēsisibus, si visum fuerit, prædicti

doctores convenient ad deliberandum de iis ordinariis negotiis quæ ad bonum Facultatis spectant. Res magni momenti, data eorum sententia, ad Consilium administrationis Rectoris aut ad Senatum deferendæ sunt.

27. Auditorum probationibus et disputationibus invitati interesse debent omnes, sententiamque suam de singulorum meritis ex conscientia proferre. Major pars suffragiorum rem decernat.

28. Doctores emeritos et honorarios collegio adnumerare fas sit : qui inter viros sive scriptis in vulgus editis claros, sive ingenio et doctrina pol-
lentes, præhabita propriorum Superiorum approbatione deligentur.

29. Superior Generalis qui doctores decuriales et sociatos ad munus docendi promovet, ab eodem remove potest; præ oculis tamen habeat quantum utilitatis ac decoris variis facultatibus afferant viri, scientia et experientia in docendo ditati.

30. Cum primo docendi munus aggrediuntur, et deinceps singulis annis ineunte novo studiorum cursu, professionem fidei emittent doctores, juxta formulam a SS. PP. Pio IV et Pio IX præscriptam.

31. Ad officium suum rite exequendum lege arctissima adstrictos esse eos meminisse iuvat; ex hoc enim pendent alumnorum profectus, sacrarum scientiarum decus, Universitatis honor, Ecclesiæ demum robur et gloria.

BIBLIOTHÈQUE
SAINT-SULPICE

VI. — DE PATRONIS TUTELARIBUS,

32. Patronos sibi adsciscant Joannem Apostolum
et divum Thomam.

VII. — DE CONSTITUTIONIBUS SERVANDIS.

33. Rector cum consilio suo regulas condere
potest hisce constitutionibus consentaneas et ad
earum accuratam observantiam ordinatas. Eæ tamen
ut plenam et permanentem vim habeant confirmari
debent a Senatu academico.

34. Nihil in hisce Constitutionibus immutandum
aut tollendum, inconsulta Sancta Sede.

